

Alle Jahre wieder: Wéi Dir jo all wësst fueren mir bei de Scouten nëtt nom Kalennerjoer, mais nom Scoutsjoer, daat wéit' Schouljoer évoluéiert. Mein Apercu z'Joert op der Generalversammlung haat mat der Sommervakanz 2011 opgehal. Duerfir wëll ech Iech elo hei, an der nämlecher Logik, en Iwerbléck ginn, iwert d'Aktivitéiten vun eisem Grupp am Scoutsjoer 2011/2012.

D'Scouts-Joer 2011/2012 bei de Scouten St. Martin Duelem

- Dëschdes den 20te September 2011 haat eise Gruppecheff all eis Cheffen an den Home invitéiert, fir an enger **1ter Entrevue** déi grouss, gemeinsam Programmpunkten op der neier Agenda ze besprechen. Besonnesch den nächsten Schnupperdag dee fir den 1ten Oktober programméiert war, an d'Finalisatioun vun eisem Projet „Natlurléierpad“ hun eis beschäftegt. Méih spéit am Owend huet sech den Home ëmmer méih gefëllt, eis Frënn aus der Amicale koumen dobei, well mir haaten ze feieren. **D'Ella**, dem Nadine an dem Rafi hier kleng Mais'chen, an eisen 1ten reng-rassegen Nachwuchsscout aus eegenem Anbau, ass eis viirgestallt ginn. A well eise Grupp als Pätter gefrot gi war, hu mir daat mat engem klengen Cadeau, engem gudden Patt an engem klengen Maufel gebührend gefeiert. Mais mir haaten nach e Grond fir houerfreg ze sinn an ze feieren. Eise Grupp konnt seng **éischt Woodbadge-Träger** begréissen a bestaunen. De Christoph an de Fonny waren frësch mam Gillwellfouillard ausgezechent ginn, sie waren souzesoen déi 1. Scouts-Doktoranden déi aus eisem Grupp erviir gange waren. E weidere Meilesteen op eisem Wee zum 20te Gebuertsdag. Daat war e richteg frouen an zefriddestellenden Owend.
- Schon den nächsten Dag den 21te September 2011 stoungen 5 vun eise Memberen bereet, fir eise Grupp um **LGS-Kongress** ze verrieden deen dëst Joer zu Bartréng programméiert war. Et ass daat eng Art Generalversammlung vun eisem Scoutsverband, an huet och de charakteristesche Charme vun enger GV. Mais Uerdnung an Transparenz mussen eben sinn!! An dëst Joer war d'Leedung vum Verband nei ze wielen, waat deem Owend awer e gewësse Stellenwert geséichert haat.
- Fir Sondes de 25te September 2011 haat eise Verband op Bartréng op den **LGS-Cheffdag 2011** geruff. 15 Cheffen vun eisem Grupp, also eng ganz grouss Delegatioun, waren dëser Invitatioun gefollegt an hun sech bei engem variéierte Programm, déi nei Leitlinien vum Verband virféieren gelooss. Spannend, a bis ganz zum Schluss nett verroden war d'Fro nom Ausgang vum Concours 100 % Bësch, 100% Guide/Scout, deen um Cheffdag 2010 lancéiert ginn war, an un deem mir eis jo mat eisem Projet „Natlurléierpfad“ bedeelegt haaten. Zum Enn vum Cheffdag ass dunn d'Kaatz aus dem Saak gelooss gin, an, eis Projet haat den 2te Prais gemacht. Déck houerfreg hu mir de Gewënn, e Bon iwert 400 € fir e Chalet vum Verband ze lounen, an Empfang gehollt. Direkt hu mir dunn beim Verband de Chalet um Neihaisgen fir e gemeinsamen Wannercamp mam ganze Grupp reservéiert.
- Iwerhaapt stung eise Projet „Natlurléierpfad“ an dësen Deeg ënnert engen gudden Stär. A senger lëschter Sitzung virun de Gemengewahlen, haat den Duelemer Gemengerot eng Demande vun eis, fir eise Projet ze **subsidéieren** um Ordre du jour, an huet décidéiert, eisen Asatz finanziell ze ënnerstëtzen. Duerfir nach nodréilech en décke Merci!
- Samsdes den 1ten Oktober hate mir nees op eise **Schnupperdag** invitéiert. D'Biber an d'Wëllefcherscheffen haaten e flotte Programm zesammengestallt, fir nei Kanner direkt mat enger Versammlung unzesprechen, an eis Cheffen, flankéiert vun e puer Carapio'en haaten fir d'Elteren e flotten Accueil mat Kaffi an Eisekuch op d'Been gestallt. Mais daat scho bal onanstänneg gudd. Wieder war wuel dru schold, datt mir nëmmen 5 nei Kanner an eis Lëschte konnten androen.
- Sondes den 2ten Oktober 2011 haat eis Gemeng op d'Feier zum **nationalen Komémoratiounsdag** geruff. Obwuel déi meeschte Branchen vun eisem Grupp nach guer keng Versammlung an der neier Saison gehaat hun, war d'Delegatioun vun de Scouten mat hirem Fändel eng vun de gréisste Gruppen um Kortège.

- De 14ten Oktober 2011 huet de **Montéeskarussel** nees ugefaang ze dréien. Fir d'éischt hu se bei **de Wëllef** hir eelsten an erfahrene Kanner mat vill Spill a Spaas, an enger Tréin am Knapplach, un d'Avex virun gereecht fir esou Platz ze maachen fir nei Frënn déi hinnen aus de Biber sollten zougeféiert gin.
- De 15ten Oktober 2011 war och daat esou weit. Zu Duelem hunn déi grouss Biber hir **Montée an d'Wëllefcher** gemacht. No engem flotte Parcours duerch d'Duerf, hu si als lëschten Challenge misten eng respektéierend Afebréck iwerwannen. No der Selbstiwerwindung haate se sech de Respekt vun hiren neie Frënn de Wëllef, an hiren neie Foullard wirklech verdéngt.
- Donnegdes den 10ten November 2011 sinn de Steve, de Carlo an d'Monique nomëttes op **St. Martin** an der Pfalz gestart. Do wollten se sech recykléieren waat d'Feieren vum helleg Mäerten ugeet. An deem Wënzerduerf si se doran nämlech Spezialisten andeems se do de Mäertensdag, hirt Weinfest an d'Erntedankfest zu engem iwwerregionalen Groussfest kombinéieren. Vill flott Impressiounen, e Footing op den héichste Bierg vum Pfälzerwald, e Cache, gudd Iessen an e super Wein waren d'Resultat vun dësem Schnupperkurs, den mir emol eng Kéier mat méi enger grousser Delegatioun widerhuele sollten.
- No lange Viirbereedungen war et Sonds den 13ten November endlech esou weit. Den **Naturléierpad**, mat deem mir um Chefdag am September den 2te Prais gewonnen haaten, war esouweit färdig a sollt **ageweit** ginn. Den Dag virun, waren nach lëscht Arbechten färdig gemacht gin, an esou konnt Sonds nomëttes, bei bäschem Hierschtwieder, d'öffentlech Präsentatioun vun eisem Rondwee duerch d'Natur ronderem Duelem stattfannen. En Présence vu ganz villen Eiergäscht, Memberen a Frënn gouf virun der Gemeng den 1te Panneau enthüllt an der Gemeng iwerreecht. Anschliessend ass déi ganz Gesellschaft zesummen eng 1te Kéier déi 2.3 km ofgang an huet dobei vum Rafi déi verschidden Statiounen viirgestallt an erkläert kritt. Eng Rezeptioun mat Eierwein a Schnittercher huet duerno am Home dëse Feierlechkeet würdeg an zünfteg beschloss.
- Samsdes de 26ten November 2011, den Dag virum 1ten Advent, war nees **Adventskränz** bastelen an ausliwweren eise Programm. Dank dem Annie senger engagéierter Viirarbecht, konnt och dëst Joer eis trei Klientèle mat Zeiten beliwwert ginn. Leider sollt et dem Annie seng lëscht Saison un der Adventskranz-Front gewiecht sinn. Mat Respekt an Dankbarkeet kucken mir op déi, laang Joeren zeréck, wou hat mat sengem emsichtigen Asatz laang virum Advent, an da besonnesch an der Woch virum 1ten Advent, duerfir gesuergt huet, dass all Mënsch konnt zefridden sinn. Eis Klienten, eis Kanner an nëtt zoulëscht eis Kees.
- Sonds den 27ten November haaten sech och dest Joer eng Partie Cheffen aus eisem Grupp RV gin, fir bei der **Porte ouverte beim Buttek Mosaik** zu Fëlschdref eng Hand mat unzepaken. Mat eisem traditionellen Gromperekichelchersstand, hu mir aktiv den Hunger an der Welt, oder op mannst zu Fëlschdref bekämpft, an esou e klengen Steen an dee Mosaik vu praktescher Nächsteléift beigedroen.
- Vun Freides dem 2ten bis Sonds dem 4ten Dezember 2011 haaten eis **RaRo** nees eng Editioun vun hirem **Montéescamp** ouni Montéskandidaten. Fir richtig an déi nei Saison ze starten haat eis RaRo-Chefféquipe emol nees richtig déif an d'Trickkëscht gegräff. Zu Bilschdreff haate se sech am Chalet vun den LGS ageriicht, fir do hir Basis ze hun fir déi geplangten Aktioun. Samsdes moies si si zesummen a Richtung Léck gefuer. Do virun, zu Chaudefontaine, haate se an engem aalen Arméisfort RV, fir e Parcours à la „fort boyard“ mat baal alle Schikanen. Jhust d'Schlangen an de Goldreen zum Schluss hun gefeelt. Op alle Fall war dëss Aventure eng neierlech Steigerung an der, un Héichpunkten nëtt armer, Geschicht vun eiser RaroBranche.
- An enger Versammlung am Advent huet de Stanislas mat sengen Avex, **d'Krëppchen** an der Duelemer Kiirch aus hirem Depot erofbruecht, fir datt e puer gudd Leit ronderëm den Alexandre se opriichte konnten.
- Donnegdes de 15ten Dezember 2011 ware mir nees e bëschen gestresst. Mat iwer 40 Leit hu mir an der Coque e Cateringsatz gestëmmt, fir eis Kees ze beliewen. Gleizzeitig ass op deem Owend de Stan mat enger Delegatioun Kanner op Beetebuerg gefuer, fir **d'Friddenslicht vu Betlehem** fir eise Grupp ze kréien.
- Fir Sonds den 18ten Dezember haaten d'Nadine an de Rafi, eis jonk Elterenkoppel d'Gruppecheffen op d'Feier vun der **Daaf vun hirem klengen Ella** op Iechternach invitéiert. An am Nomëtteg koumen dunn och nach déi aner Cheffen an d'Iechternacher Boulette dobei, fir matzeferien. Et war iwert den eigentleche Familljekrees eraus, eng grouss FamilljeFeier. Daat sinn esou kostbar Momenter, wou een sech bewusst gétt, waat fir e Privileg et ass, zu engem Grupp ze gehéieren, an deem Freundesliebe an déif Verbonnenheet ëmmer nees ze spieren an ze erliewen sinn.

- Fir Méindes den 19ten Dezember 2011 haat eis Chefféquipe all RaRo iwert 23 Joer, an aaner ancien combattants, déi mir am Laaf vun de Joeren aus den A'en verluer haaten, op eng Kachkéisschmier an den Home invitéiert. Mat dëser 1ter Réunioun sollt de prakteschen Départ gehollt gin, fir eis nei **Albatross-Branche**. Mir hun direkt e Programm fixéiert vir an daat neit Joer ze starten, an esou war eisen neie Bébé gebuer. Elo haat eise Grupp och all Branchen; déi et bei den LGS ginn.
- Well mir jo um Cheffdag direkt eise Gewënn vun engem Bon an eng Reservatioun vum Chalet Nic Rollinger um Neihaisgen fir e **gemeinsame Wantercamp** ëmgemënz haaten, gouf et elo déck Zeit datt dee Wantercamp Realitéit sollt ginn. Esou si vum 21ten Dezember bis zum 24ten all eis Branchen op mannst fir 2 Deeg an eng Nuecht um Neihaisgen gewiecht. Donnegdes den 22ten Dezember hu mir eis all, mat eise Frënn vun der Amicale, fir eng Krëschtveillé an d'Keltenhaus zeréckgezunn. No Schiedspill Gesang a géigenseiteger Bescheerung ass dunn déi ganz Gesellschaft vun iwer 90 Leit an de Chalet op de Krëschtmenu gestiirmt. Do haat de Steve, mat sengen Helferlein sech nees selwer iwertraff. Fir esouvill Leit, esou gudd ze kachen, daat mëcht him soubaal keen no! An datt e gudd war huet hien selwer gemierkt; d'Nofro waar esou grouss, dass all Reserven mobiliséiert musste ginn, an nach Barquetteweis Reis nogekacht gouf. Daat war am ganzen nees e ganz grousst Erleefness, wéi eis Scoutsfamill am Alter tëschend 3 Méint an iwer 65 Joer zesummen dem Jesus sei Gebuertsdag gefeiert huet.
- Och nach während deem Wantercamp hu fleisseg Leit aus eiser Mëtt beim **AS Adventure** de Leit d'Cadeau'en angepaakt, fir mat deem gewonnenen Geld matzehëllefen, dass esou flott Erleefnesser wéi eis Krëschtfeier, wou mir jidferen gratis invitéiert haten, och an Zukunft nach méiglech bliwen.
- Mais och elo sollte mir nach keng Rouh gin fir 2011. Op helleg Owend sinn eis Avex nomëttes vum Neihaisgen op Duelem komm, fir dann mat dem **Friddenslicht** vu Betlehem bei eeler oder krank Mënschen aus eisen Dierfer ze goen. Mat dëser Demarche konnte sie dëss Mënschen d'Freed an d'Hoffnung vu Krëschttag ganz konkret erliewen loossen. Dunn huet et geheescht en Zelt um Parvis vun der Duelemer Kiirch opzeriichten an alles färdeg ze maachen, vir no der Familljemetten owends, an der Kiirch de Leit d'Friddenslicht vu Betlehem, a virun der Kiirch **Glühwein a Krëschttagsgebäck** ze offeréieren. Mat dem gudden Gefill, eis Zeit fir daat Richteg agesaat ze hunn, konnte mir nom Oofrichten mat richteger Krëschttagsfreed am Häerz an eis Familjen Helleg Owend feieren goen.
- Fir Dënschdes de 24te Januar haate mir eis Memberen a Frënn, an eis Gemengeresponsabel an den Home invitéiert, fir mat eiser jährecher **Generalversammlung** och no baussen fir Transparenz ze suergen andeems mir souwuel eis Aktivitéiten wéi och eis Finanzgestioun exposéiert hun. Bei dëser Gelegenheit hu mir dem Schafferot vun der Duelemer Gemeng e Bréif iwerreecht mat deem mir hinnen all eis Wënsch a Froen viruléen wollten, fir an enger spéiderer Réunioun mat hinnen doriwwer ze schwätzen.
- Fir Freides de 17te Februar 2012 haaten eis Albatrossen op de sougenannten **Wantergrilling** an den Home invitéiert. Hei hu sech eng Handvoll Frënn getraff, fir e puer flotter Stonnen ze verbréngen, an dem Wanter eng laang Nues ze maachen. Mir Scouten loossen eis dach nëtt vum Kalenner eise Programm diktéieren. A wien gemengt huet, am Wanter kéint een nëtt grillen a Sangria drénken, deen krut deen Owend eng Lesson verpasst.
- Samsdes de 25te Februar 2012 haat de Stanislas seng Explorer aus der Vakanz bei den Home geruff, fir **Fakelen ze bastelen**. Et war Buergsamsdeg an deen Daag gouf zu Fëlschdreff, an den Dag drop zu Duelem d'Buerg gebrannt nëtt ouni virdrun d'Leit mat engem Fakelzuch bei d'Buerg zéien ze loossen. A well e Faakelzuch ouni Faakelen eng ziemlech daischter Affaire wier, hun eis Avex hei de richteg Geste gemacht, deen an engem och nach eppes klenges an eis Kees bruecht huet.
- Mëttwochs de 7te Mäerz haat sech eng kleng Delegatioun vun eisem Grupp mam Rafi, a mam Steve eisem GC, am Athenäum afonnt fir en duebele RV. Als éischt haat aus eise Reihen d'**Sabrina Pinto** am läschte Joer esouvill extra Effort'en gemacht nieft sengen Engagementer an de Scouten a bei der Musek, dass hat zur Remise vum **Insigne en or** vum programme **mérite jeunesse** zougelooss gi war. Mais domat nëtt genuch. Op Uregung vum SNJ haate mir mat eisem **Projet Naturléierpad** fir de prix du mérite kandidéiert. Well eise Projet ënnert déi läscht 3 Finalisten gewielt gi war, haate mir als Grupp eng Invitatioun fir dëss Soirée kritt, op där den definitive Gewënner sollt proklaméiert gin. Mir waren nëtt wéineg iwerrascht an déck frouh, wéi de Jury eise Projet als Gewënner vum Prix du mérite 2012 proklaméiert huet. A gleichdrop krute mir schon, aus den Hänn vum Präz Guillaume, de prix du mérite 2012 iwerreecht. Daat haat sech jo rentéiert, mat deem Naturléierpad. No all deem Luef, hun eis d'Schnittercher op der Rezeptioun nach besser geschmaacht.

- Mais mir konnten eis nütt op eise Lorbeeren ausrouen. Enn der Woch; Samsdes den 10ten a Sondes den 11ten Mäerz stung **Scouts-Teater** um Programm. Also hun nach läscht Prouwen, an Tonnen Viirbereedungen müssen gemacht gin, fir dass mir och d'Editioun 2012 vum Duelemer Scoutsteater gudd iwert d'Bühn sollte bréngen. Eise Viirsaatz, méiglechst ville vun eise Kanner a Jonken d'Chance vun engem Optrëtt ze bidden, bréngt et mat sech, dass eis Teaterséancen laang ginn. Bei 78 Aktiven op der Bühn a 6 ganz verschiddenen Inszenéierungen déi dem Alter vun der jeweiligen Akteuren entsprach hun, ass daat kee Wonner. Mais eise Publikum, huet daat am Groussen a Ganzen gudd ugehollet, huet duergehaalen an huet eis 2 mol de Sall an eis Kees gudd gefällt.
- Dönschdes den 13te Mäerz haate mir all eis Scouten Cheffen a Frënn vun der Amicale an den Home invitéiert, fir bei enger leckerer Grillade an engem gudde Patt, den **19te Gebuertsdag** vun eise Grupp ze feiern. Nom Départ vun de Kanner a Jonken, hun d'Cheffen an d'Amicale aus 9 verschiddene Proposen de Site erausgesicht, op deem mir am Summer 2013 e gemeinsame Gebuertsdagscamp fir eisen 20te Gebuertsdag wäerte feiern. Wa keen Imprévue eis nach zu engem anere Choix forcéiert, gesi mir eis all am Juli 2013 zu Losheim am See.
- Samsdes de 17te Mäerz 2012 hun direkt 8 vun eise Cheffen déi nei Formule vum Verband ausprobéiert waat de Recyclage an d'Weiderbildung vun de Cheffen ugeet. Um **Kanudag** um Neihaisgen, hu sie e ganzen Daag laang, praktesch Iddien vermëttelt kritt, déi hinnen den édukativen awer spillereschen Asatz mat eise Kanner a Jugendlechen bereicheren wäerten.
- Dee selwechten Daag owends haaten sech Cheffen, Amicale a Frënn déi op der Kirmes 2011 gehollef haaten, zu Altwies beim **Kohn RV** ginn, fir do, bei engem gudde Maufel, an der Erënnerung vu gemeinsam Erlieftem Kraaft a Schwonk fir nei Unternehmungen ze tanken.
- Donnegdes owends den 22te Mäerz 2012 haat de Carlo, eis Biber a Wëllefcher op e **Kannerkraitzwee** an d'Duelemer Kiirch invitéiert. Während enger Stonn hun eis kleng Scouten mat Täscheluuchten déi schéin Duelemer Kraitzweebiller ënnersicht a beschwaat, an esou hu sech och déi Kleng op de Sënn vum Ouschterfest agestëmmt.
- Sondes de 25te Mäerz 2012 war de Rafi mat enger handvoll vun eise Carapio moies fréih op Schëffläng gefuer, fir do beim **JOCAPI** (der Journée Carapio) eis Farwen ze vertrieeden. Bei staarker Konkurrenz vun vill méih grouse Gruppen, war de Rafi um Enn ganz erstaunt an och houfreg, dass sech eis Jonk, als 5. plazéiert ënnert iwer 20 Equippen, ganz gudd geschloen haten.
- Um Grupperot vum 27te Mäerz 2012 haate mir e flott Erleifnëss. Een vun eise ganz fréie Scouten de **Jérôme Wintringer** deen de ganze Parcours duerch all Branchen gemaacht haat déi mir zu senger Zeit haaten, an dee schon am Hierscht 1995 seng Montée an d'Avex gemaacht haat, huet elo nom Enn vu sengem Studium, sech an d'Reihen vun eiser Chefféquipe geschlo'en fir bei der RaRo eng Cheffcharge ze iwerhuelen. Esou war de Winti eemol méih „the man of the day“.
- Samsdes den 31te Mäerz 2012 haat eis Gemeng d'Vereiner invitéiert, fir bei der **Groussbotz 2012** ze hëllefen. Wéi gewinnt ware mir Scouten, mat ville Kanner eng vun de gréisste Gruppen, déi matgehollet hun, d'Natur op eiser Gewaan, fir d'Fréijoer nees propper ze maachen. Et ass awer erschreckend, wéivill Sauerei datt een ëmmer nees dobausse fënnt, obwuel d'Sensibiliséierung fir d'Ëmwelt dach awer schon eng ganz Generatioun laang gemaacht gëtt. Eng gudd Grillade, déi eis Gemeng de fleissegen Helfer spendéiert huet, huet dëss flott Aktioun ofgeschloss.
- Dönschdes de 17ten Abrëll haaten eis Gruppecheffen zesummen mam Machti eng **Entrevue mam neien Schäfferot vun der Duelemer Gemeng**. Et giong ëm de Brëif mat eisen Proposen a Froen ronderem eisen Home, dee mir hinnen op eiser Generalversammlung am Januar ginn haaten. Et war eng kurz, awer extrem konstruktiv Gespréichsronn, bei der mir a quasi alle Punkten d'Erfëllung vun eise Wënsch an Aussicht gestallt kruten, och wann daat bei verschiddenen Saachen, wéi der Erneuerung vum Ofwaasserkanal vum Home, misst bis no eiser Kirmes zeréckgestallt ginn.
- Méindes den 23ten Abrëll haate mir gleich 2 RV'en, wouvunn deen éischten allerdéngs guer nütt erfrélech war. Eiser Frëndin an treier Gruppecheffin dem **José seng Mamm war gestuerwen**, a gouf op deem Daag zu Miersch begruewen. Et war fir eis eng Eieresaach, datt mir mat enger grousser Delegatioun vu Memberen aus dem Grupp, dem José op dësem schmerzleche Wee mat eiser Präsenz eis Verbonnenheet an eis't Mattgefill wollten weisen. Fir dee selwechten Owend, haate mir, mat vill Krämpes en Termin fixéiert, fir mat enger Brancheniwergreifender Delegatioun zu **Losheim**, d'Infrastruktur an Situatioun vun der Plaz ze inspizéieren, déi mir fir eise Gruppegebuertsdagscamp 2013 erausgewielt haten. Fir

nëtt, sou kuerz virun der Kirmes mussen en neien Datum ze fannen, hu mir dann décidéiert, mat der verbleiwender Equippe awer déi Visite duerchzezéien. Esou sinn deen Owend de Rafi, de Carlo, de Marc an de Fonny bei déckem Reen duerch d'Hüetten an laanscht de Séi geschlappt, während eise Steve mat engem Platten huet missen kuerzfristeg opginn. Trotzdeem war dëss Visite fir all Bedeelegter ganz interessant an erbaulech, an e gemeinsame Maufel am Brauhaus um Séi huet eis schon villversprechend Ahnungen fir 2013 opkomme gelooss.

- Samsdeg den 28ten Abrël 2012 haate sech eis Cheffen RV am Home ginn, fir mat enger gemeinsamer **Schaffaktioun** am, a ronderem den Home fir Uerdnung ze suergen fir déi imminent Kirmes an doriwwer eraus. D'Memberen vum Chefferot vun eiser Gemeng haaten eis Invitatioun op den Apéritif ugehollt, an sie hu mat eis de Projet vun eisem Holzschapp finaliséiert.
- De selwechten Daag owends hu sech eis Avex mat e puer vun hire Frënn vu Maacher am Home RV gin. Beim Lagerfeier hu sie gewaart, bis et 1 Auer nuets wier an domat Zeit fir opzebriechen an op de **Pélé des jeunes 2012** ze goen. Eng 20 Pilger hu sech vun Duelem op de Wee an d'Staadt gemacht. Dank dem José sengem onbeschwéierten Asatz, konnte mir eis , matten an der Nuecht, dobaussen um halwe Wee mat Cola a Kuch stärken, an ee schlamme Pilger konnt nach gerett ginn. Dem José e grouse Merci heifir! Well mir méiglechst nëtt op fréquentéierte Stroossen , mais éischters op sècheren Feldwéier wollte goen, hu mir platzeweis Schwierigkeeten gehaht, fir nach richtig Wéier ze fannen. Sou si mir streckeweis querfeldein nuets duerch Bëscher a Wissen geschlach, déi déck am Bulli louchen. Entsprechend hun eis Schong duerno och ausgesinn, an no der Mass huet een genau gesinn, wou an der Kathedrale, déi Duelemer sech niddergelooss haaten. Et sief nach bemierkt, dass eise Frënd de Winti, un der Gestaltung vun der Pélémass ganz aktiv bedeelegt war, daat am Kader vu senger spiritueller Formatioun als angehenden RaRo-Cheff. Wéi d'Traditioun et verlaangt, hu mir eise Pilgergang mat engem gemeinsamen Kaffidrénken um Mäertchen beschloss, éih nees jidfereen midd awer zefridden heemgefuer ass.
- Den Daag drop den 30ten Abrëll haate sech d'Albatrossen beim Home Rv ginn, fir e verfréitenen Meekranz maachen ze goen. Duerno sollt **Hexennuecht**, also d'Nuecht zum 1. Mee gefeiert ginn. Geduecht war, bei enger Portioun Ietsebulli aus der 100 L-Gulaschkanoun, déi dobei zum 1ten Asatz komm ass, am Freien e puer flotter Stonnen beim Feier ze verbréngen. Mais d'Wieder wollt nëtt wéi mir wollten. Et gouf Donnerwieder op Donnerwieder, de Meekranz blouf am Besch, eis Albatrossen beim Home an zum gudde Schluss war och nach den Ietsebulli uebrannt.
- Samsdes den 12te Mee hun eis Wëllef an der Stadt d'**Wëllefchersandacht** an der Kathedral materlieft. Esou hu sie, mat hiren Alterskollegen aus alle Wëllefchersgruppen vu Lëtzebuerg, d'Oktave 2012 matgefeiert an domat eng altersgerecht an zeitgeméiss Roll an dëser schéiner lëtzebuerger Traditioun fonnt.
- Dënschdes de 15te Mee ass vun alle Seiten Material op d'Scoutswiss bruecht ginn, an hektesch Aktivitéit ab 17:00 Auer huet ugekënnegt, dass nees eng gréisser Saach an der Luucht héing. Den **Newcomerfestival 2012** an eis **Scoutskirmes** sollt an den nächsten 2 Deeg iwert d'Bühn goen. Fleisseg si Bühn an Zelter, Iess , Gedrénksstänn a Spiller opgeriicht ginn, fir dëse groussen Event kënnen ze géréieren. Vir deem Ganzen kräfteméisseg gewues ze sinn, an als Kontrapunkt zum Wantergrilling am Februar, hu sech dun spéit owends eis **Albatrossen** op der Bühn ageriicht fir do eng **Summerraclette** mat Glühwein ze genéissen. Derart gestärkt konnte mir d'Kirmes komme loossen.
- Fir déi 2. Editioun vum **Newcomerfestival** haaten mir eng Rëtsch ganz interessant Kënschtler konnten gewannen, wéi zum Beispill de Serge Tonnar mat Legotripp, déi eise Public bis spéit nuets begeeschtere konnten.
- Den 17 Mee op Christihimmelfahrt stung eis eigentlech **Scoutskirmes** um Programm. Traditionsgeméiss hu mir Scouten zum Optakt d'Christihimmelfahrtsmass animéiert, a vill Leit hun eis félicitéiert fir daat Erliefness vu Gemeinschaft daat mat eisem Karaokemassgesang opkomme wier. Anschliessend ass jidfereen, deen do nach nett war, op sein Posten geflitzt, fir matzehëllefen, och dëss Kirmes- Editioun zu eise Gäscht hirer, an zu eiser an eisem Caissier senger Zefriddenheet duerchzezéien. Alles an allem ass eis daat och nees gelongen, wéi mir Freides owends beim Ofschlossiessen vun Amicale a Cheffen midd awer zefridden festgestallt hun.
- Direkt duerno, Sondes den 20te Mee waren eis Wëllef schon erëm um Dill. Den nationalen **Wëllefchersrallye 2012** huet sie an d'Eislék un de Stauséi geféiert, wou sie dem Grupp vum Séi sollten hëllefen, zesummen mat aneren Ruddel aus dem ganze Land „**d'Geheimnis aus dem Stau**“ endlech ze

léisen. Obwuel et furchtbar gereent huet, hun sech d'Wëllef nëtt découragéiern gelooss, an owends konnte sie, naass awer zefridden heemfueren an „Mission accompli“ mellen.

- Paischt-Dënschdes de 5te Juni 2012 waren der vun eise Grupp och schon nees fréih um Dill. Bei der **Iechternacher Sprangprozeessioun** hun déi eng mat musikaleschem Know-how, an déi aner mat ganzem Kierperasatz, zum Geléngen vun dëser eemoleger Manifestatioun beigedroen. Duelem war alt nees eng Kéier dobei! Samsdes de 16te Juni stoung mir schon erëm am Scoutshiem um Kierfecht fir enger gudder Frëndin de Réck ze steipen. Dem **Cheryl sein Papp** war onerwaart, a vill ze fréih aus der Mëtt vu senger Famill gerappt ginn. Kloer datt mir hatt bei deem schwéiere Gang nett wollten eléng loossen.
- Samsdes den 30te Juni huet dunn endlech eppes méih erfreesche eis op de Plang geruff. **D'Deborah Vandivinit an de Mike Welter** sollten zu Fëlschdreff **bestued**, ginn. Sie allebéid ware laang Joeren trei Memberen vun eise Grupp gewiecht, éih sech eis Wéier getrennt haten. Mais well d'Deborah awer via déi neigegrënnten Albatrossen de Wee an eis Reihen zeréckfonnt haat, stongen déi Albatrossen bereet, fir hinnen de Wee an den Hafen der Ehe e bëschen méih lëschtég ze gestalten. Zesummen mat de Fëlschdreff Pompjéen haate sie sech, mat vill Geschier, virun der Fëlschdreff Kiirch plazéiert fir déi 2 an Empfang ze huelen. Ënnert dem Thema „*et brennt an der Urologie*“ hu sie missten allebéid hir berufflech a Scoutsméisseg Erfahrung asetzen, fir eng Rëtsch Aufgaben ze léisen éih sie konnten op den Aperitif lassteieren.
- Dee selwechte WE haaten sech eis RaRo nees eng Kéier, no bewährtem Schéma, op **Férange** zeréckgezunn. Do hu si um Jang sengem Weier flott Momenter an, a beim Weier verbruecht, an eise Frënd dem Jang, als Merci, eng Partie Arbecht un Wissen an Hecken erleedegt.
- Sondes den 8te Juli 2012 sinn eis Biber beim **nationale Bibertreff zu Bieles** dobeigewiercht. Trotz dem vereente Wieder, haaten eis jéngste Scouten vill Spaass um Rallye mam Benno Biber an den anere Biber aus dem ganze Land. An och daat schlecht Wieder haat seng gudd Saiten. Well sie zoppnass a kaal waren an eng Plaatze fir ze raschten gesicht hun, hu frëndlech Leit aus dem Minette sie, sou naass wéi se waren, mat an hiren Appartement gehollt, fir sie ze wärmen an sie am Wärm raschten ze loossen. Esou hun eis Kleng eng Erfahrung vu Léift a Mënschlechkeet gemaacht, déi an hinnen, wéi an de Cheffen, de Glaawen an daat Gudd am Mënsch gestärkt huet.
- Mettwochs den 11te Juli haate mir eise **läschte Grupperoot** um Enn vun der Saison. Jhust virun de Summercamp'en hu mir dobei nach dem Steve an dem Fernande hire Gebuertsdaag gefeiert an eis gestärkt fir déi Opreegungen déi vrun eis louchen.
- Samsdes de 14te Juli sinn eis Biber am Home zesummekomm, fir mat Sack und Pack a Richtung Miersch ze fueren. Do sollten sie déi nächst 4 Deeg um **BiberCamp „Herkules 2012“** eng Ausbildung zum Held matmaachen, déi sie befähege géif, de Göttervater Zeus ze befreien an esou dem Herkules ze hëllefen nees op den Olymp zeréckzekommen. Fir ganz vill nei Biber war daat den éischte richtege Camp. An et huet e puer Deeg gebraucht, bis jidfereen de System vu Chargen a Mathëllefen verstaan haat. Mais um Enn ware mir zu enger richteger Scoutstrupp zesumme gewues, an et war baal schued schon nees heem ze müssen.
- Elo huet och **d'Wëllef** neischt méih doheem behalen. Vum 14ten bis den 18ten Juli, ware sie mam **Peter Pan um Trip**. Duerfir haaten sie sech zu Réiser am Scoutschalet aquartéiert fir hei e zünftege **Summercamp** ze erliewen. Flott Aktiviteiten stoungen um Programm, wei T-shirten fierwen mat Batik, en Duerfspill wou d' Wëllef der Fee hier Fiederen hu misste fannen, fir hir nozegoen an dann Aufgaben leisen, fir dem Peter Pan ze hëllefen. Et gouf eng speziell Olympiade mat ennerannerem folgenden neien olypeschen Disziplinen: Zitrounenhockey an Kakuettenscheissen. Quittish, d'Nuetsspill passend zum Camp-Thema gouf leider ennerbrach well d' Noperen vum Chalet sech vun de Scouten gesteiert gefillt hun. Um Enn huet awer keen müssen iwert d'Briet an d'Waasser bei d'Haifësch sprangen, an eis Kanner si midd awer frouh nees doheem ungelandt.
- Vum 23 Juli bis den 2 August 2012 hun eis **Avex** sech um Sennengerbiereg op der Campplatz „Beschhaus“ fir hire Summercamp ënnert dem Thema „**Stadt Lëtzebuerg**“ zesummefonnt. D'Avex-Cheffen haaten déi brillant Iddie, eise Kanner emol daat méih no ze bréngen, waat all Joer dausenden Touristen aus aller Welt grouss A'en a vill Fotoen maachen deet well et eigentlech ganz aussergewöhnlech schéin ass. Eis Haaptstadt an hir reich Geschicht. Entsprechend dem Thema gouf et grousst Stadtspill an den traditionellen Hike huet hinnen Kasematten zougänglech gemaacht déi normalerweis fir den Public zou sinn. D'Nuecht duerften sie zwar nëtt an de Kasematte verbréngen, mais duerfir haat d'Stadter Gemeng

hinnen eng flott Plaatz an der enceinte vun der aler Festung zougewisen, wou wuel nach nett vill Lëtzebuurger waren, besonnesch nett fir ze schlofen. Schwämm, Lasergame, Olympiad an Pizza-Uewen-Bauen a Benotzen waren weider Highlights op dësem originelle Camp. Eis arem Chefféquipe ass och dëst Joer nees uerg gestresst ginn. Zum engen haate sech vill vun de Kanner eifreg op d'Partie Lasergame viirbereed, e Spill waat eis Cheffen fir d'éischt erlieft hun. Sie haate sech viirgehollet de Cheffen emol ze weisen wou de Bock d'Lach huet. Mais esou séier hu sech de Ben an de Stan nëtt ënnerkréien gelooss a sie hu sech hirer Haut daper erwiert. Wéi sie gemengt haaten, sech bei engem gemittleche Lagerfeierowend erblosen ze kënnen, goufen sie mat der Kraft vun der Natur an der Onwägbarkheet vum nomadesche Liewen konfrontéiert. Owes speit kuum zu engem schroen Donnerwierder daat sie mat wëllem Sturm, Blëtz, Donner a masseg Reen regelrecht iwerfall huet. Eis Cheffen hu gutt a prompt reagéiert, a sie hu sech mat de Kanner an hire Schlofsäck an Carrymatten am Chalet a Sëcherheet bruecht! Den nächste Daag huet sech gewisen, datt daat kee Mutwëll war. D' Schloofzelter stungen zwar nach, mais eis Yurte haat de Sturm ëmgeheit an an d'Feier geblosen. Déi war futti. De ganze Camp war béis zerrappt awer stung nach. Sie waren mat engem bloen A dovun komm wann een mat de belsche Scouten vergleicht, déi an der selwechter Zeit zu Kanech mat de Pompjéen evakuéiert musste ginn, well hir ganz Zelter fortgerappt gi waren. Mais eis Avex hu sech nett aus der Rouh brénge gelooss. Sie hu gebotzt an opgeräumt, an duerno ass de Camp onbeiiert, a ganz no Plang, zu Enn bruecht ginn. Esou Erlebnësser gehéieren einfach dozou a stäerken d'Zesummengehéieregkeetsgefëll vun deenen déi esou eppes zesummen er, an -iwerlieft hun. Mat dem Wëssen och a méih schwierege Situatiounen besto'en ze kënnen, gestärkt hun d'Avex hire Camp ofgeschloss a fréien sech op d'Aventuren, déi déi nächste Saison bréngt.

- Eis **Carapio** hun dëst Joer vum 15ten bis de 24te Juli 2012 e Gemeinschaftscamp mat anere Gruppen um Neihaisgen erlieft. Ënnert dem Thema „**Wood-art**“ an ënnert der Organisatioun vun der Equipe Native Village an Zesummenaarbecht mat der CaraPio Equipe, hu sie 9 Deeg laang de kreativen Ëmgang mat Holz geléiert an ausprobiert. Eng Reih praktesch Hinterlassenschaften sinn elo nach um Neihaisgen ze bewonneren an ze benotzen.
- Ganz weit fort huet et dunn daat Joer eis RaRo geféiert. Vum 16ten Juli bis de 6ten August 2012 si 5 vun eise Frënn a Finland ënnerwee gewiecht, fir do um internationale **RaRo Summercamp Roverway 2012** Scoutismus vum Feinsten matten an der wonnerbarer Natur vun der finnescher See'en-Landschaft ze erliewen. Zu 50 Jonker an engem Grupp mat Scouten aus aller Welt, hu sie déi éischt 4 Deeg op engem abenteuerleche Kanu-hike verbruecht, deen sie iwert déi rieseg Séien am Süden vu Finland gefouert huet. Paddelen bei all Wieder, bivakéieren an der Wildnis, an openeen -ugewise sinn, daat waar authentischen Scoutismus un deem de BP seng Freed gehaat hätt. Déi lëscht 4 Deeg koumen all d'Gruppen op enger grousser Campplatz zesummen, wou dunn 3000 jonk Mënschen aus allen Natiounen zesummen d'Natur erlieft, geschafft a gefeiert an sech ausgetosch hun. Trotz zeitweisem Reen a striktem Alkoholverbued, waren eis RaRo'en déif beandrockt vun der Internationalitéit vun deem Meeting a vun der frouer a positiver Stëmmung ënnert de jonke Leit.
- Wien gemengt haat, elo wier d'Saison ofgeschloss, deen haat sech geiirt. Eis jéngste Branche mat den eelste Scouten d'**Albatrossen** huet nach eemol vu sech schwätze geden. Am Fréijoer war aus hire Reihen de Viirschlaag komm, op **Santiago de Compostella** ze pilgeren. Daat huet een eiser Chefféquipe natiirlech nett 2 mol brauchen ze soen. Mais well vun Duelem bis op Santiago gudd 2100 km ze maache sinn, war et kloer, dass mir do e pluriannuelle Projet lancéiert haaten. Fir et nëtt beim Projet ze loossen huet sech geschwënn d'Iddie duerchgesaat 2012 eng 1. Etappe zu Fouss als **Camp volant** ze maachen. Esou hu sech Dënschdes den 21ten August 7 vun eise Leit vun doheim opgemaacht, fir eist Maskottchen de Rosch-Manuel op de Wee op Santiago ze bréngen. Bei engem Camp-volant gëllt et, alles am Rucksack matzehuelen waat ee braucht. Gezei, Schlofsack, Zelt, Kachgeschier, Waasser, Ravi. Ennerwee sollte mir mierken, dass mir nach vill ze vill agepaackt haaten, an duerfir hu mir um halwe Wee emol eng Rëtsch iwerflësseg Kilo'en an engem Besch verstoppt. Jidfereen ass vu sech doheim lassgang, an du sinn mir zu Uespelt an der Kiierch zesummekomm, wou eise Frënn a fréihere Gruppechef de Jang, eis eng déifgrënneg Segens- an Abschiedszeremonie bereet huet, an eis den 1te Stempel an eise Pilgerpass gedréckt huet. No 4, zum Deel harden, awer ganz flotten a bereichernden Deeg si mir Freides owends um Camping zu Verdun ukomm, wou eng waarm Douche gewisen huet, dass d'Zivilisatioun och duerchaus angenehm Saiten huet. Den Daag drop hu mir nach vum Bischof vu Verdun de Stempel an eis Pilgerpass kritzt, an du gong et per Auto heem. Mir waren lancéiert! Santiago ass nëtt méih sëcher virun eis! Elo

endlech, no ville flotten Momenter, an no vill Arbecht konnten déi gréng Hiermer fir eng kuerz Zeit an de Schaaf verschwannen. Wann ee rechent, dass mir an deene **gudd 35 Wochen** déi d'Saison baussend de Vakanze laang waar, och nach em **déi 150 normal Versammlung** mat de Kanner a Jugendlechen aus allen 6 Branchen haaten, dass mindestens **6 Grupperéit** an eng Partie Virbereedungs- a Planungs-Réuniounen vun de Cheffen vun den eenzelne Branchen ënnert sech néideg waren, da kann een so'en mir hätten eis e bëschen Vakanz verdéngt gehaat.